

御纂醫宗金鑑卷一

訂正仲景全書傷寒論註

傷寒論後漢張機所著發明內經奧旨者也並不引古經
一語皆出心裁理無不該法無不備蓋古經皆有法無方
自此始有法有方啟萬世之法程誠醫門之聖書但世遠
殘闕多編次傳寫之誤今博集諸家註釋採其精粹正其
錯譌刪其駁雜補其闕漏發其餘蘊於以行之天下則大
法微言益昭諸萬世矣

辨太陽病脈證并治上篇

太陽主表爲一身之外籙總六經而統榮衛凡外因百病

御纂醫宗金鑑卷一

訂正仲景全書凡例

一傷寒論與金匱要畧原是一書自林億校刊遂分爲二
失先賢之意後趙開美仍合爲一書今復其舊使後學知
傷寒與雜證原非有二也

一全書經文諸家舊本或字有增減或節有分合或重出不
書衍文或正誤各不相同是集則以仲景全書爲準而參
之各家以昭畫一

一傷寒論金匱要畧法律本自井然但係千載遺書錯誤頗
多雖經歷代註家編次詮解然各執己見位置無常難以



爲法茲集傷寒分經仍依方有執條辨而次序先後則更爲變通金匱門類悉照林億校本而綱領條目則詳爲分別並不拘泥前人惟在啓發後學足裨實用

一經中凡錯簡遺誤文義不屬應改補刪移者審辨精覈詳於本條經文之下其有全節文義不相符合絕難意解者雖勉加註釋終屬牽強然其中不無可採之句故另彙二帙一曰正誤一曰存疑附之卷末以備參考金匱要畧倣此

一書中辭精義奧註釋誠難若徒尙辭華必支離蔓衍何以闡發微言是註惟期簡易明顯發揮經旨間或旁叅互證



亦惟援引本經不事虛文用滋眩惑

一傷寒論自成無已創註以來踵之者百餘家金匱要略自
趙良衍義後繼之者十餘人各有精義羽翼經文然或涉
浮泛或近隱晦醇疵並見難以適從茲汰其重複刪其冗
沓取其精確實有發明者集註於右用資考證

一上古有法無方自仲景始有法有方其規矩變化之妙立
法成方之旨各有精義皆當明晰茲於每方必審究其立
方主治之理君臣佐使之相輔功能性味之相合一一解
於其後卽方中用水之甘瀾麻沸火之宜文宜武煎之緩
急漬之遲速服之頻頓莫不各有適病之宜前人或置而

不論者必備錄而詳解之

一是集傷寒則首六經次合病併病次差後勞復食復陰陽
易次壞病溫病瘧濕暍霍亂次可汗不可汗可吐不可吐
可下不可下次平脈辨脈法此一書之次第也首綱領次
具證次出方次因誤致變次因逆成壞此一篇之次第也
首經文次註釋次集註次方藥次方解集解其經文有缺
誤者則加辨論於經文之下以按字冒之其與本條互相
發明而非專論本條者加辨論於本註之後亦以按字冒
之此逐條之次第也俾後學了然心目易於融會貫通金
匱要畧序法倣此

金匱二十五章內有與傷寒文同者十之一二雖爲重出
然亦間有義別之處今將傷寒論中已有專註者則不復
贅釋其與本經切要者必重加發明以闡揚其旨
一古人姓氏有傳記詳明者昭昭可考若僅書其字則無從
知其名矣夫以其人竭慮殫精久而泯其迹所不忍也故
於無考者書其字可考者書其名以示不沒其善之意



御纂醫宗金鑑卷一

訂正仲景全書傷寒論註太陽上篇目錄

桂枝湯

桂枝加附子湯

五苓散

麻黃杏子石膏甘草湯

十棗湯

桂枝加人參湯

葛根黃芩黃連湯

桂枝去芍藥湯



桂枝去芍藥加附子湯

桂枝加厚朴杏子湯

瓜蒂散

大陷胸湯

小陷胸湯

三物白散

大陷胸丸

文蛤散



御纂醫宗金鑑卷一

訂正仲景全書傷寒論註

傷寒論後漢張機所著發明內經奧旨者也並不引古經
一語皆出心裁理無不該法無不備蓋古經皆有法無方
自此始有法有方啟萬世之法程誠醫門之聖書但世遠
殘闕多編次傳寫之誤今博集諸家註釋採其精粹正其
錯譌刪其駁雜補其闕漏發其餘蘊於以行之天下則大
法微言益昭諸萬世矣

辨太陽病脈證并治上篇

太陽主表爲一身之外籙總六經而統榮衛凡外因百病



之襲人必先於表表氣壯則衛固榮守邪由何入經曰雖有大風苛毒勿之能害是也若表氣虛則榮衛之氣不能禦外故邪得而乘之經曰虛邪不能獨傷人必因身形之虛而後客之也衛陽也榮陰也風陽邪也寒陰邪也邪之害人各從其類故中風則衛受之傷寒則榮受之衛分受邪則有汗爲虛邪桂枝證也榮分受邪則無汗爲實邪麻黃證也榮衛俱受邪均無汗皆爲實邪大青龍證也大綱三法用之得當其邪立解用違其法變病百出緣風爲百病之長故以風中衛列爲上篇寒傷榮與風寒兩傷列爲中下二篇其餘目俱詳於本篇之下俾讀者開卷了然有

所遵循也

太陽之爲病脈浮頭項強痛而惡寒

註

太陽膀胱經也太陽之爲病謂太陽膀胱經之所爲病也

太陽主表表統榮衛風邪中衛寒邪傷榮均表病也脈浮

表病脈也頭項強痛惡寒表病證也太陽經脈上額交巔

入絡腦還出別下項連風府故邪客其經必令頭項強痛

也惡寒者因風寒所傷故惡之也首揭此條爲太陽病之

提綱凡上中下三篇內稱太陽病者皆指此脈證而言也

按

榮衛二者皆胃中後天之穀氣所生其氣之清者爲榮濁

者爲衛衛卽氣中之慄悍者也營卽血中之精粹者也以

其定位之體而言則曰氣血以其流行之用而言則曰營衛
營行脈中故屬於陰也衛行脈外故屬於陽也然營衛之所以流行者皆本乎腎中先天之一氣故又皆以氣言
曰營氣衛氣也

集註滑壽曰脈在肉上行主表也

方有執曰表即皮膚營衛麗焉故脈見尺寸俱浮知病在
太陽表也項頸後也惡寒者該風而言也風寒初襲而鬱
於表不能再勝風寒之外忤故畏惡之

程應旆曰太陽經之見證莫確於頭痛惡寒故首揭之

吳人駒曰頭為三陽之通位項為太陽之專位有所障礙

不得如常之柔和是爲強痛

太陽病發熱汗出惡風脈緩者名爲中風

註

太陽病卽首條脈浮頭項強痛而惡寒之謂也衛爲表陽風屬陽邪風邪中人則衛受之從其類也風中於衛卽發熱者以風衛皆陽其性本熱故變熱甚捷不似傷寒待其閉鬱而始熱也衛病不能固表又爲陽邪所蒸故腠理疎而汗出也汗出表虛爲風所忤故惡風也風性柔軟故脈緩也此承上條言太陽病又兼見此脈證者名曰中風以爲中風病之提綱後凡稱中風者皆指此脈證而言也

集註

方有執曰脈緩卽下文陽浮而陰弱之謂言既有如首條



所揭之太陽病加之發熱汗出惡風而脈緩者則其病
是觸犯於風所致故名中風

汪琥曰中風非東垣所云中府中藏中血脈之謂蓋中
與傷字同義仲景論中不直言傷風者恐後學不察以咳
嗽鼻塞聲重之傷風混同立論故以中字別之也脈緩當
作浮緩看浮是太陽病脈緩是中風脈中篇緊脈亦當倣此
太陽中風陽浮而陰弱陽浮者熱自發陰弱者汗自出啻惡
寒淅淅惡風翁翁發熱鼻鳴乾嘔者桂枝湯主之

註

太陽中風卽上二條合而言之又詳舉其證以出其治也

後凡稱太陽中風者皆指此脈此證也陰陽指榮衛而言

非指尺寸浮沉也陽浮卽越人曰三菽之浮肺之浮也肺
主皮毛取之而得者卽衛分之浮也六菽之浮心之浮也
心主血脈取之而得者卽營分之浮也營分之浮較之衛
分之浮則無力而弱故曰陽浮而陰弱也衛爲風客則衛
邪強而發熱矣故曰陽浮者熱自發營受邪蒸則營不固
而汗出矣故曰陰弱者汗自出營衛不和則肌表疎緩故
有嗇嗇之惡寒淅淅之惡風翕翕之發熱也然在皮膚之
表非若傷寒之壯熱無汗惡寒雖近烈火而不減惡風雖
處密室而仍畏也皮毛內合於肺皮毛不固風邪侵肺則
氣壅而鼻鳴矣胸中者陽氣之本衛陽爲風邪所干不能

敷布則氣上逆而為乾嘔矣故宜桂枝湯解肌固表調和營衛也

集註

程應旆曰嗇嗇惡寒者肌被寒侵怯而斂也淅淅惡風者

肌因風灑疎難禦也翕翕發熱者肌得熱蒸合欲揚也嗇嗇淅淅翕翕字俱從皮毛上形容較之傷寒之見證自有浮沉淺深之別

桂枝湯方

桂枝 三兩

芍藥 三兩

甘草 二兩

生薑 三兩

大棗 十二枚

右五味㕮咀三味以水七升微火煮取三升去滓適寒溫



服一升服已須臾歎熱稀粥一升餘以助藥力溫覆令
時許遍身熱熱微似有汗者益佳不可令如水流漓病必
不除若一服汗出病差停後服不必盡劑若不汗更依
前法又不汗後服當小促其間半日許令三服盡若病重
者一日一夜周時觀之服一劑盡病證猶在者更作服若
汗不出者乃服至二三劑禁生冷黏滑肉麪五辛酒酪臭
惡等物

按

桂枝湯方桂枝下有去皮二字夫桂枝氣味辛甘全在於
皮若去皮是枯木矣如何有解肌發汗之功宜刪此二字
後倣此